

PO O LE A, PE AISEA, ma le PE FAAPEFEA:

O SE VAEVAEGA O LE TOEFUATAIGA

Saunia e Faith Sutherlin Blackhurst

Mekasini a le Ekalesia

Faapea o loo e i ai i se malaga e vaiaso le umi i le matafaga faatasi ma le aiga o lau uo. Sa tele ni mea malie sa e faia, ae ua amata ona e misia lou lava aiga. Ona auina atu lea e lou tama ia te oe se feau e fia iloa pe o faapefea mai—o le mea tonu lava lea sa e manaomia ia lagonaina o loo alofagia oe ma o loo manatua.

E fai sina faapena o le olaga i le foga-eleele. E le auina mai e le Atua ia i tatou ni tesi [texts], ae o loo tatou o ese mai lo tatou aiga faalelagi, o lea la o se tasi o auala e fesootai mai ai le Tama Faalelagi Lona alofa mo i tatou o le auina mai lea o perofeta.

TISIPENISIONE

O perofeta latou te taitaia mea e ta'ua o *tisipenisione*, o vaitau o taimi (1) e tuuina mai ai e le Atua e le itiiti ifo ma le tasi se taitai perisitua ua faatagaina i le lalolagi ma le (2) o lea taitai, o se perofeta, e aoao sa'o e uiga i le ata o le faaolataga mai le Atua. Ona aoao mai lea e le perofeta, pe *faasoa atu*, le talalelei i tagata.

Faafetai i tusitusiga paia, ua tatou iloa ai e uiga i le tele o *tisipenisione*. O nisi o *tisipenisione* taua o Atamu, Enoka, Noa, Aperaamo, Mose, Iesu Keriso, ma Iosefa Samita. Sa amata e le Alii se *tisipenisione* e ala mai i nei perofeta taitasi.



ATA NA TUSIA E BEN SIMONSEN

Ina ia aoao atu le talalelei, o le a manaomia ona mafai ona e faamalamalama atu pe o le a le liliuese, *tisipenisione*, ma le Toefuataiga. E mafai ona fesoasoani le siata leni.



LILIESE

Liliuese=amioleaga. Pe a liliuese se tagata po o se vaega mai upumoni o le talalelei a Iesu Keriso, teena ia perofeta, ma pauu atu i le agasala, ua latou i ai i le liliuese.

TOEFUATAIGA

O se toefuataiga o se aga o le toefafoi mai o se mea i lona tulaga na muai i ai. E le o se toefaaleleia, lea e fesui ai se mea o i ai ina ia fatuina ai se mea fou. Mo se faataitaiga, afai na e manao e toefuatai se fale tuai, o le a e toefauina i le faataatiaga lava e tasi na muai i ai. Atonu e te manao e faaopoopo i ai se magalafu fou, ae o le a e suia ai le fale, ae le o le toefuataina.



Sa manaomia ona toefuatai mai le talalelei a Iesu Keriso aua sa lei toe i ai i le taimi o le Liliuese Tele. Sa ola tagata mo le tele o seneturi e aunoa ma le Ekalesia. O lea na *toefuatai* mai ai e le Alii Lana Ekalesia ma le talalelei e ala mai ia Iosefa Samita, e pei lava foi ona sa valoia ai e perofeta anamua (tagai Isaia 2:1-3; 29:13-14; Galuega 3:19-21; Faaaliga 14:6-7; 2 Nifae 3:3-15).

Ua i ai iinei le talalelei moni a Iesu Keriso e nofo ai—pe o le a e nofo ai ea? E ui lava ina faatupulaia pea le amioleaga o le lalolagi, ae o le a tumau pea lava le Ekalesia a Iesu Keriso e oo i le iuga.

E i ai sau filifiliga e fai—o le filifiliga lava lena na feagai ma tagata talu mai le amataga o taimi: pe o le a e mulimuli ea i le perofeta? Afai e te faia, o le a faamanuiaina oe ma maua le Agaga e taialaina oe.